



Adresa: **Ul. Hamdije Čemerlića 39a**
71000 Sarajevo
<http://www.voda.ba>

tel. +387 33 726-444
fax. +387 33 726-423
e – mail: info@voda.ba

Broj: **UP-1/21-1-40-608-4/24**

Datum: **30.12.2024. godine**

«Agencija za vodno područje rijeke Save» Sarajevo, rješavajući po zahtjevu Grada Visoko za donošenje Rješenja o prethodnoj vodnoj saglasnosti za aktivnost – rekonstrukcija betonskog mosta preko rijeke Bosne u gradu Visoko, a u postupku pribavljanja urbanističke saglasnosti, na osnovu člana 109. stav (1) tačka 10. Zakona o vodama («Službene novine Federacije BiH», broj 70/06) i člana 200. stav (1) Zakona o upravnom postupku («Službene novine Federacije BiH», broj 2/98, 48/99 i 61/22), donosi

R J E Š E N J E **o prethodnoj vodnoj saglasnosti**

1. Gradu Visoko daje se prethodna vodna saglasnost za aktivnost – rekonstrukcija betonskog mosta preko rijeke Bosne izgrađenog na dijelu parcela označenih kao k.č. broj: 591/1 K.O. Oznakovići i k.č. broj: 4302 K.O. Visoko, grad Visoko a u postupku pribavljanja urbanističke saglasnosti za rekonstrukciju istog.
2. Prethodna vodna saglasnost se daje na osnovu pregleda dostavljene dokumentacije, utvrđenog činjeničnog stanja i pod sljedećim uslovima:
 - 2.1. Da korisnik prethodne vodne saglasnosti osigura izradu tehničke dokumentacije na nivou glavnog projekta na osnovu koje će se vršiti izvođenje radova na rekonstrukciji betonskog mosta preko rijeke Bosne izgrađenog u gradu Visoko. Tehnička dokumentacija treba biti urađena i revidovana od strane pravnih lica koja imaju ovlaštenja (lista «A») pribavljena od strane Federalnog ministarstva poljoprivrede, vodoprivrede i šumarstva i treba da obradi sva pitanja definisana članom 5. stav (2) Pravilnika o sadržaju, obliku, uslovima, načinu izdavanja i čuvanja vodnih akata («Službene novine Federacije BiH» broj 31/15, 55/19, 41/20 i 63/22).
 - 2.2. Izgled rekonstruisanog mosta mora biti usaglašen sa važećom prostorno-planskom dokumentacijom Grada Visoko.
 - 2.3. Sa vodoprivrednog aspekta kota, donje ivice konstrukcije mosta u polju i na osloncima, treba da bude viša za minimalno 80 cm računajući i proračunati uspor u odnosu na kotu velike vode rijeke Bosne ranga pojave 1/100 godina.
 - 2.4. Obalni upornjaci kao i srednji stubovi mosta, u odnosu na prirodni poprečni profil korita rijeke Bosne trebaju imati takav položaj da ne smanjuju širinu prirodnog korita.
 - 2.5. Sastavni dio investiciono - tehničke dokumentacije za izgradnju mosta treba biti: Elaborat/projekat u kojem će se provesti hidraulički proračun propusne moći otvora mosta, odrediti nivo stogodišnje velike vode na lokaciji mosta sa eventualnim usporom, provesti hidraulički proračun za dionicu uzvodno i nizvodno od mosta te utvrditi vučne napone u koritu vodeći računa o tome da su obale rijeke Bosne na predmetnom lokalitetu uređene (lijeva obala uzvodno i nizvodno od mosta; desna obala uzvodno od mosta) te za slučaj ako su veći od dozvoljenih u prirodnom koritu odrediti potrebnu dužinu prelaznih dionica od obalnih upornjaka do prirodnog korita sa oblaganjem kosina korita u svrhu zaštite od erozije.
 - 2.6. U projektnoj dokumentaciji dati tehničko rješenje sistema za prikupljanje i ispuštanje oborinskih voda sa konstrukcije mosta u recipijent, definisati mjesto ispuštanja oborinskih voda u recipijent te dati detalj ispusta.
 - 2.7. Projektnom dokumentacijom definisati organizaciju i tehnologiju izvođenja radova na rekonstrukciji betonskog mosta preko rijeke Bosne i radova u obalnom pojasu, te definisati mjere koje je potrebno poduzeti u toku izvođenja radova kako ne bi došlo do erozionih procesa u koritu i obalnom područja rijeke Bosne, do uništavanja uređenih obala, do podlokovanja temelja stubova kao i negativnih uticaja na druge korisnike voda (vodosnabdijevanje, ribari i sl.).
 - 2.8. Predmjerom radova predvidjeti i radove na uklanjanju pomoćnih objekata i radove na čišćenju i uređenju korita i obala po završetku rekonstrukcije mosta, uređenje korita rijeke Bosne u zoni obalnih upornjaka i stubova mosta, odvodnje oborinskih voda i dr.

- 2.9. Pri izradi projektne dokumentacije pažnju posvetiti na položaj postojećih instalacija (vodovodne, kanalizacione, elektro, PTT i dr.) te dati tehničko rješenje za ukrštanje ili izmještanje istih.
- 2.10. Projektom dokumentacijom treba, u skladu sa zakonskim propisima, definisati način privremenog pa sve do konačnog zbrinjavanja otpada koji će nastati u toku rekonstrukcije mosta i uređenja obala i vodotoka.
- 2.11. Otpad koji će nastati u toku izvođenja planiranih radova se ne smije ni privremeno odlagati na česticu «vodno dobro», odnosno unositi u vodotok i na njegove obale.
- 2.12. Pri izradi tehničke dokumentacije pridržavati se pravila struke i nauke te zakonske regulative vezane za ovakvu vrstu radova te ekološko-ekonomskih zahtjeva.
3. Ovu prethodnu vodnu saglasnost će Investitor koristiti u postupku pribavljanja urbanističke saglasnosti i ona definiše sve uslove koje Investiciono-tehnička dokumentacija treba ispuniti za pribavljanje vodne saglasnosti, a sve u skladu sa Zakonom o vodama i provedbenim dokumentima (Pravilnik o sadržaju, obliku, uslovima, načinu izdavanja i čuvanja vodnih akata, Uredba o uslovima ispuštanja otpadnih voda u okoliš i sisteme javne kanalizacije).
4. Po izradi investiciono-tehničke dokumentacije, u skladu sa uslovima iz tačke 2. dispozitiva ovog Rješenja, korisnik prethodne vodne saglasnosti dužan je da ovoj Agenciji podnese zahtjev za izdavanje vodne saglasnosti na izrađenu projektну dokumentaciju.
5. Zahtjev za izdavanje vodne saglasnosti dostavlja se u skladu sa članom 8. i 19. stav (2) Pravilnika o sadržaju, obliku, uslovima, načinu izdavanja i čuvanja vodnih akata.
Uz zahtjev se prilaže :
 - 5.1. Revidovana Investiciono-tehnička dokumentacija urađena u skladu sa uslovima iz dispozitiva ovog rješenja,
 - 5.2. Rješenje o urbanističkoj saglasnosti za rekonstrukciju predmetnog mosta,
 - 5.3. Dokaz o izvršenoj uplati upravne takse u iznosu od 60 KM.
6. Ova prethodna vodna saglasnost se daje sa rokom važenja od 3 (tri) godine od dana pravosnažnosti rješenja i ista prestaje da važi ukoliko ne bude pribavljena urbanistička saglasnost i ne bude podnesen zahtjev za izdavanje vodne saglasnosti.
7. Ukoliko nakon izdavanja ove prethodne vodne saglasnosti, a u toku pripreme dokumentacije za podnošenje zahtjeva za izdavanje vodne saglasnosti, nastupe okolnosti za koje se može pretpostaviti da mogu biti od uticaja na rješavanje zahtjeva za donošenje rješenja o vodnoj saglasnosti, nosilac prava iz prethodne vodne saglasnosti dužan je o nastanku tih okolnosti obavijestiti ovu Agenciju, odnosno kantonalno ministarstvo, prije podnošenja zahtjeva, odnosno obavezno navesti okolnosti u zahtjevu za izdavanje vodne saglasnosti.
8. Ovo rješenje o prethodnoj vodnoj saglasnosti može se izmjeniti ukoliko za to nastupe razlozi utvrđeni u članu 130. stav (1) tačka 1., 2., 3. ili 4. Zakona o vodama, a zainteresirane stranke podnesu argumentiran zahtjev za izmjenu ovog vodnog akta.

Obrazloženje

Grad Visoko podnio je ovoj Agenciji dana 29.11.2024. godine zahtjev za donošenje rješenja o prethodnoj vodnoj saglasnosti zahtjev za donošenje rješenja o prethodnoj vodnoj saglasnosti za aktivnost – rekonstrukcija betonskog mosta preko rijeke Bosne izgrađenog na dijelu parcela označenih kao k.č. broj: 591/1 K.O. Ozrakovići i k.č. broj: 4302 K.O. Visoko, grad Visoko a u postupku pribavljanja urbanističke saglasnosti za rekonstrukciju istog.

Uz zahtjev je dostavljena i pregledana sljedeća dokumentacija:

- Ovjerena kopija Obavještenja o razvrstavanju pravnog lica prema klasifikaciji djelatnosti broj: 07-32.5-91625/19 izdatog dana 19.11.2019. godine od strane Službe za statistiku za područje Zeničko-dobojskog kantona,
- Ovjerena kopija Uvjerjenja o registraciji poreznog obveznika izdatog dana 15.11.2019. godine od strane Porezne uprave Federacije BiH - Kantonalni porezni ured Zenica,
- Ovjerena kopija Rješenja o upisu u Jedinstveni registar obveznika indirektnih poreza broj: 04/1-17-1-UPJR/1-7981-1/19 izdatog dana 16.12.2019. godine od strane Uprave za indirektno-neizravno oporezivanje Banja Luka,
- Ovjerena kopija Uvjerjenja o registraciji/upisu u Jedinstveni registar indirektnih poreza broj: 04/1-17-1-UPJR/1-7981-2/19 izdatog dana 16.12.2019. godine od strane Uprave za indirektno-neizravno oporezivanje Banja Luka,

- Ovjerena kopija Izvoda iz planske dokumentacije izdatog dana 11.11.2024. godine od strane Službe za urbanizam, imovinsko-pravne, geodetske poslove i katastar nekretnina, Grad Visoko,
- Ovjerena kopija Rješenja o prethodnoj vodnoj saglasnosti broj: UP-I/25-1-40-593-5/19 izdatog dana 05.12.2019. godine od strane «Agencije za vodno područje rijeke Save» Sarajevo,
- Ovjerene kopije Katastarskog plana UR broj: 04-26-2216/2024-3 i broj: 04-26-2216/2024-5 izdatih dana 01.11.2024. godine od strane Službe za urbanizam, imovinsko-pravne, geodetske poslove i katastar nekretnina, Grad Visoko,
- Ovjerene kopije Zemljišnoknjižnog izvotka broj: 041-0-NAR-24-021 612 ZK uložak broj: 1046; broj: 041-0-NAR-24-021 613 ZK uložak broj: 7191 izdatih dana 01.11.2024. godine od strane Zemljišnoknjižnog ureda Općinskog suda u Visokom,
- Glavni projekat sanacije betonskog mosta preko rijeke Bosne u Visokom (Knjiga 1 i 2, šifra: 01/2-796/16) urađen od strane «TRASA» d.o.o. Sarajevo, mart 2017. godine,
- Elaborat o hidrotehničkom dijelu projekta – Hidraulički proračun otvora i odvodnja mosta urađen od strane «ENCOS» d.o.o. Sarajevo, novembar 2017. god (Knjiga 2 - svezak VI),
- Dokaz o uplaćenju upravnoj taksi na zahtjev.

Nakon izvršenog uvida u dostavljeni zahtjev i priloženu dokumentaciju utvrđeno je da su uz zahtjev dostavljeni potrebni prilozi, te je ovaj organ u skladu sa odredbama Zakona o upravnom postupku pokrenuo postupak u cilju utvrđivanja relevantnih činjenica u ovoj upravnoj stvari.

U skladu sa članom 124. stav (1) Zakona o vodama i članom 21. stav (3) Pravilnika o sadržaju, obliku, uslovima, načinu izdavanja i čuvanja vodnih akata o predmetnom zahtjevu je dana 03.12. 2024. godine obavještena javnost putem obavještenja na oglasnim pločama «Agencije za vodno područje rijeke Save» u Sarajevu i Zenici, te dana 05.12.2024. godine u dnevnom glasilu «OSLOBOĐENJE». U datim rokovima nije bilo pisanih izjašnjenja o predloženim aktivnostima iz zahtjeva. Na osnovu uvida u dostavljenu dokumentaciju utvrđeno je:

Postojeći most preko rijeke Bosne u Visokom izgrađen u periodu od 1927. do 1929. godine nalazi se na regionalnom putu R 445 i povezuje uže gradsko područje na lijevoj obali sa naseljima na desnoj obali rijeke Bosne. Predstavlja svojevrsni simbol grada i važna je konekcija centra grada sa autobuskom stanicom i industrijskom zonom Ozrakovići. Most je izgrađen kao AB sa tri raspona gdje je rasponska konstrukcija u obliku luka sa projektovanim srednjim rasponom dužine 34 m i krajnjim rasponima po 31,5 m. Zadnja rekonstrukcija mosta je bila 1974. godine. Zbog značajnih oštećenja na mostu (na kolovoznoj ploči, stubovima i gredama nadlučne konstrukcije, gornjim dijelovima stubova iznad lučne konstrukcije, na asfaltu i ogradi mosta) planirana je rekonstrukcija mosta kroz više faza. Lučna konstrukcija i temelji stubova su u dobrom stanju.

Uvidom u dostavljeni Elaborat o hidrotehničkom dijelu projekta – Hidraulički proračun otvora i odvodnja mosta koji je sastavni dio Glavnog projekta (Knjiga 2 - svezak VI) utvrđeno je da je za most, u visinskom pogledu niveleta mosta prevashodno određena na osnovu hidrauličkog proračuna otvora mosta kojim je za max proticaj povratnog perioda 1/100 utvrđena kota velike rijeke Bosne na lokaciji mosta od $H_{1/100} = 415,30$ m.n.m. odnosno kota donje ivice konstrukcije mosta ($H_{DIKM} = 418,75$ m) je na visini od min 3,31 m iznad kote velike vode povratnog perioda 1/100. Hidrauličkom analizom utvrđeno je da ne postoji negativan uticaj mosta na okolno područje.

Projektom sanacije mosta predviđena je ugradnja osam slivnika za prihvatanje i odvodnju oborinskih voda sa ispuštanjem u rijeku Bosnu.

Na osnovu utvrđenog činjeničnog stanja i dostavljene dokumentacije, a u svrhu smanjenja negativnih uticaja predmetne aktivnosti na stanje voda i prava na vode dodijeljena drugim korisnicima, kao i onemogućavanja degradacije kvaliteta voda, podnosiocu zahtjeva su ovim vodnim aktom, u tački 2. dispozitiva rješenja, shodno odredbama Zakona o vodama, Pravilnika o sadržaju, obliku, uslovima i načinu izdavanja i čuvanja vodnih akata i Uredbe o uslovima ispuštanja otpadnih voda u okoliš i sisteme javne kanalizacije propisani uslovi koje je Investitor dužan ispuniti prilikom izrade projektne dokumentacije koja se dostavlja uz zahtjev za izdavanje vodne saglasnosti.

Na osnovu prednjeg i provedenog postupka, a shodno odredbama člana 111. Zakona o vodama i člana 5. Pravilnika o sadržaju, obliku, uslovima, načinu izdavanja i čuvanja vodnih akata, doneseno je Rješenje kao u dispozitivu.

Podnosilac zahtjeva je uplatio upravnu taksu u iznosu od 80 KM u skladu sa Zakonom o federalnim upravnim taksama i tarifi federalnih upravnih taksi («Službene novine Federacije BiH», broj 6/98, 8/00, 45/10 i 43/13).

Uplaćeni su i posebni troškovi prema Zaključku ove Agencije broj: UP-1/21-1-40-608-3/24 od 20.12.2024. godine.

UPUTA O PRAVNOM LIJEKU:

Protiv ovog Rješenja može se uložiti žalba Federalnom ministarstvu poljoprivrede, vodoprivrede i šumarstva, putem ove Agencije, u roku od 15 dana od dana prijema Rješenja.

Žalba se podnosi neposredno pismeno, usmeno na zapisnik ili preporučeno putem pošte ovom organu i taksira se sa 15 KM administrativne takse prema tarifnom broju 3. Tarife federalnih administrativnih taksi.

Obrađivač akta:

Nermina Hodžić, dipl.inž.građ.

Po ovlaštenju
Rukovodilac sektora za izdavanje vodnih akata



Mihad Pezo, dipl.inž.građ.

Dostaviti:

- Grad Visoko
- ul Alije Izetbegovića br 12 A, 71300 Visoko
- ⊖ AVP Sava, ISV-vodna knjiga
- Sektor 40 - arhiva
- Oglasna ploča - AVP Sava